



*Sabtu, 11 Maret 2023*  
**Ogen: 1 Korinti 10:13**



**"Asa Gegeh"**



**M**anusia itepa Dibata i bas abu taneh nari. Posisi enda encidahken maka manusia idemi alu erbage-bage keterbatasanen rikut pe ras kelemahen; si erbahanca manusia e jadi mahluk si lemah janah pe tergantung sada ras sidebanna i bas kerina dampar. Lemah secara pisik bage pe lemah secara perukuren. Si enda pe icidahken arah perenungenta wari enda, maka manusia ngarapken gegeh tupung iperhadapkan ku bas percuban, perbeben, persoalen. Si jadi perenungen man banta, tupung kita iperhadapkan ku bas percuban, ku ja nge kita ndarami gegeh? Si jadi ulu gegeh tupung manusia ngalaken percuban e me gegeh si rehna i bas Dibata nari (*IberekenNa nge gegeh man bandu gelah ngasup kam nggengkenca, janah radu ras si e iberekenNa pe dalam puluh*). Dibata si jadi ulu gegeh manusia, erbahanca manusia e ngasup lako ngalaken dingen nggengken percuban/persoalen si reh nderpa ku tengah-tengah kegeluhenna, erkiteken manusia labo ngasup adina gegehna nge ibabana lako ngalaken teptep persoalen si lit. Raja Daud tupung ia jadi raja, asum ipakena gegeh si reh i bas Dibata nari, ngasup ia maba bangsa Israel bage pe ngasup ia engkuasai dirina; tapi tupung gegehna iandalkenna, raja Daud ndabuh ku bas dosa. Raja Salomo mindo gegeh rikut pe ras kepentaren man Dibata lako mabai dingen minpin bangsa Israel guna erkemalangen man Dibata. Gambaran arah dua tokoh enda nuduhken maka keterbatasanen rukur ras gegeh bas manusia banci sempurna adina i andalken gegeh arah Dibata. Kesempurnan gegeh manusia jadi tupung manusia e erpengendes janah erpengarapen man Dibata selaku tinepa manusia.

Dahiken dahin si enggo iendesken man banta alu ngarapken gegeh arah Dibata nari; pakelah perukuren Dibata guna ngukuri persoalen si turah i tengah-tengah geluhta; tetaplah kita ngarapken gegeh idur Dibata nari sebab IA ngenca ulu gegeh ras kengasupen.

*“Gegehky rehna ibas Dibata nari; erbahanca aku paguh”*